

Bouôjour à matîn. Ch'est mé, Pierrot Germain, tchi vos pâle à matîn.  
I' faut qu'jé c'menche par vouos souhaiter un Bouan Noué.

Y'a un an qué j'tais à travailli avec un groupe pouor prépathier un r'port pouor l's États entouor "Dementia". La s'maine pâssée j'présentînmes chute stratégie au Député tch'a responsabilité d'la Santé. J'fus râvi quand j'quéménchis à pâler au monde entouor le sujet qué tu trouves comment compliquée qu'chutte condition est.

Ch'est bein îportant qué tout l'monde comprannent chein qu'i s'arriv'tha.  
Au c'menchement lé monde peuvent aller à la boutique et oublier chein qu'i'veulent acater ou mett' des choses dans lus pangni qu'il'ont pon bésouin, ou i'vont râmasser tchiquechouse dans un appartement et quand il' arrivent là il ont oublié chein tch'i sont à faithe là.

Ch'est bein îportant qué tout l'monde sachent comment pâler à du monde qué tu trouves comme chennechîn. Duthant Noué i'n'y a pon d'doutes qué quand vous êtes ensembl'ye et qu' tu penses qué tchitch'un dans vot' fanmil'ye c'menche à présenter aue des sîngnes qu'i' peut ramémouaither des histouaithes du temps pâssé mais il oublie tch'est qu'i's'arrivit à matîn. Ch'est tandis chu temps-là qu'i' s'trouve mârri.

Ma bouonne femme souvent mé d'mandait éyou qu'tait sa méthe. Y'avait vîngt ans qu'ou 'tait morte. À la pliaiche dé li dithe chennechîn, j'li disais qu'ou 'tait acouo siez lyi en Angliéterre et pis ou s'en r'veindrait la s'maine tchi veint. Comme chenna ch'tait oublié auprès deux minnutes. Ch'est très îportant achteu d'visiter vot' docteu pouor demander un assessment.

Mêcredi pâssé y'avait à peu près eune trentaine à not' rêunion pouor "Dementia" au Raddisson, plusieurs pouor la preunnié fais. I' voulaient saver tch'est qu'i' faut faithe pouor c'menchi.  
Si y'a tchitch'un comme chenna dans vot' fanmil'ye ch'est bein îportant dé prendre l'action.

Vendrédi ch'tait la pus courte journée d'l'année achteu les jours vont alouôngni. J'tais à penser quand j'tais mousse y'avait tréjous un tas d'fanne à Noué, des couôsîns à visiter siez nous. J'avêmes un grand appartement à jouer, d'dans ch'tait la vieil'ye boulangu'thie.

Y'avait un grand feu, un fou et un "copper" dans l'coin. Ch'tait là qué j'jouêmes ensembl'ye. N'y'avait pon des tablettes électroniquees dans nos mains.

J'mé rappelle bein qu'si tu voulais faithe un coup d'téléphone y'avait bésouin d'monter sus eune tchaîse et enm'ner la piéche à vot' ouothelle et pâler à eune femme pouor d'mander lé neumétho pouor êt'connecté.

Quand man p'tit fréthe m'avait fait mârri j'prîns la tchaîse et d'mandais à la femme lé neumétho pouor "Gouôrray 24 s'i'vos pliaît", ch'tait l'neumétho pouor l'aûsil'ye à St Saûveu.

La femme à l'aut' but mé disait dé mett' "lé phone bas Peter" et "n'sais pon si bête"! Ch'tait ma couôsinne Connie Lé Maître ! Achteu les neuméthos sont si longs tu n'peux pon les ramémouaither .

Et bein mes bouonnes gens jespéthe qué touos d'vous s'en vont aver un Bouan Noué et eune bouonne santé l'année tchi veint.

À la préchaine.

